

四庫全書

經部

欽定四庫全書

春秋或問卷十六

宋 呂大圭 撰

成公

春二月無冰

元年

或問或謂開冰而後書無信乎曰春秋書無冰三桓十四年春正月無冰是年二月無冰襄二十八年春無冰無冰者恒燠之罰也而皆書之於春或謂開冰而無乃書無冰與大無麥禾書之於歲終為一例然以鄙意觀之大無麥禾書之一歲之終可也若無冰則但當於鑿

冰之時而無冰可鑿則書之非必待既開冰而後知其無也然則春秋以周正紀事亦可知矣

王師敗績于茅戎

或問書王師敗績于茅戎何也曰程氏曰王師於諸侯不言敗諸侯不可敵王也於外裔不言戰外裔不能抗王也不可敵不能抗者理也其敵其抗王道之失也桓王伐鄭兵敗身傷而經不書敗存君臣之義立天下之防也劉康公邀我伐之敗績于徐吾氏而經不書戰辨

內外之分立中國之防也是皆聖人筆削非魯史之舊  
文也然筆於經者雖以尊君父辨內外為義而君父所  
以尊內外所以辨則有道矣桓王不以討賊興師而急  
於伐鄭康公不以信厚持國而輕於邀戎是失其所以  
君天下禦外侮之道也書敗績于茅戎言自敗也其自  
反亦至矣

季孫行父臧孫許叔孫僑如公孫嬰齊帥師  
會晉卻克衛孫良夫曹公子首及齊侯戰于

鞏齊師敗績齊侯使國佐如師及國佐盟于  
袤婁

或問使舉上客而文公之末年書公子遂叔孫得臣如  
齊將稱元帥而成之二年書四卿帥師會戰何也曰用  
以見大夫之爭強也於是衛未有大夫將書孫良夫曹  
無大夫書公子首而賞鞏之功晉於是六軍韓厥趙  
括鞏朔韓穿荀騅趙旃皆為卿征伐皆在大夫矣案此  
編與屈完來盟之義略同然屈完之盟書曰屈完來盟

于師則來盟者屈完之意也盟于召陵因其來盟而與之盟也齊侯使國佐如師則國佐之來請於四國也及國佐盟于袁婁則四國之欲也曷為以四國之欲言之國佐如師將以賂免非服之也晉大夫又不以德命使齊人盡東其畝而以蕭同叔子為質由是國子不可請合餘燼背城借一揖而去之卻克使魯衛之使以其辭為之請逮乎袁婁而與之盟則汲汲欲盟者晉也故反以晉人主之齊桓合九國之師以臨楚屈完來盟于師

則退于召陵而與之盟不敢以臨楚盟屈完也晉卻克  
合四國之大夫以戰齊齊侯使國佐如師則進師于袁  
婁而與之盟必欲以偪齊盟國佐也齊桓為有禮而四  
國為忿矣

取汶陽田

或問汶陽田書取何也曰石氏曰內取外邑皆曰取如  
取鄆取邾取根牟外歸魯皆曰歸如濟西龜陰及謹聞  
是也汶陽田魯地也齊人以歸于我當曰歸今而曰取

者蓋因晉之力而取之易也歸者其意也取者我也非其志也於後齊復事晉故八年使韓穿來言歸之于齊然此年齊歸我田書曰取八年齊取我田乃曰歸者取之自晉歸之自晉以見魯國之命制於晉而已故雖我田也而不得偃然有之其猶寄耳故齊歸我田書曰取猶若取之於外也齊取我田書曰歸猶若齊之所有也胡氏曰取者得非其有之稱恃大國兵力一戰勝齊得其故壤而不請於天王以正疆理則取之不以其道與

得非其有奚異然則宜奈何攷於建邦土地之圖若在封域之中則先王所錫先祖所受經界世守不可亂也不然侵小得之春秋固有興滅國繼絕世之義必有處也魯在戰國時地方五百里而孟子語慎子曰如有王者作在所損乎在所益乎經於復其故田而書取所損益可知矣

會盟于蜀

或問蜀之盟不沒公何也曰此與浮來之盟同是會也

是盟也蓋為魯病矣當是時晉主夏盟者也晉方與魯  
衛曹之師戰齊于鞏而楚即帥鄭師以從事於魯衛遂  
侵于蜀公會公子嬰齊而同十一國之人以盟于蜀豈  
魯之得已哉晉之不能卻強楚以安中國亦明矣晉不  
能卻強楚以安中國而十一國之盟皆稱人何也晉猶  
主夏盟也蓋至於晉趙武楚屈建合諸侯于宋而後晉  
楚之勢均楚靈王求諸侯于晉晉人許之而後諸侯始  
皆從楚此蜀之盟所以略之也

晉侯使荀庚來聘衛侯使孫良夫來聘丙午  
及荀庚盟丁未及孫良夫盟

或問來聘而盟何也曰案經聘而遂盟者五是年荀庚  
孫良夫十一年晉侯使卻犇來聘己丑及卻犇盟襄七  
年衛侯使孫林父來聘壬戌及孫林父盟十五年宋公  
使向戌來聘己亥及向戌盟于劉此皆諸侯使大夫來  
聘而魯要之使盟明魯不當要盟諸大夫不當自盟也  
何以知之桓十四年鄭伯使其弟語來盟宣七年衛侯

使孫良夫來盟則是來盟者其君使之也今但曰使來聘則是其君之所使者來聘而已非來盟也魯之為要盟可知矣

鄭伐許

或問鄭伐許說者以為外鄭然乎曰案春秋文十年秦伐晉成三年鄭伐許昭十二年晉伐鮮虞先儒皆曰外之也於秦伐晉則曰晉自令狐之戰不出師者三年秦不顧義見利而動又起此役此佳兵之道也於鄭伐許

則曰鄭襄背盟棄信與楚比周一歲而再伐許故外之也於晉伐鮮虞則曰楚靈不道殄滅陳蔡晉為盟主既不能救且偽會齊師假道鮮虞此狙詐之術也或曰自滅庸以後秦為楚役自晉主諸夏之盟舍秦無加兵於晉者也使晉之失伯秦人為之也於是外秦楚之伯鄭人為之也由齊桓以來爭鄭於楚桓公卒鄭始朝楚諸侯折而入楚鄭為亂階也是故外秦而後外鄭春秋之外秦以晉故也外鄭亦以晉故也則其外晉何晉之君

卿無中國之志也楚虔弑君之賊也而執齊慶封放陳  
招殺蔡侯般假討賊之名以盟諸夏而晉連年有事於  
狄鮮虞雖吳入郢於越入吳晉猶圖鮮虞也詳於狄事  
而不詳於楚則晉無中國之志也於是外晉惟蘇氏以  
秦鄭為闕文而晉伐鮮虞則亦以為外之以愚觀之是  
皆深於求春秋者也嘗竊以為事有小大辭有詳略其  
書人書氏書爵者詳辭也其直書國者略辭也秦晉之  
爭自令狐而後其事微矣故略之晉伐鮮虞亦然春秋

固不可盡以闕文視之而亦豈可字字而求其義乎善乎呂本中之言曰先儒徃徃以為不稱人者皆外之恐未必然記事有遠近有詳略有小大不可以一概論褒貶之實則不在是焉秦之伐晉事小而地遠故略之特罪其諸侯自相侵伐殺生自恣耳如加人而中國之則遂合於禮乎又曰事有小大則記有詳略史家常法春秋特以是褒貶垂訓後世爾所謂吾無隱乎爾也晉伐鮮虞罪在伐人之國以天子在上而諸侯放恣擅行征

討也其事則微故其書亦略晉伐鮮虞略辭也其罪則自見矣以晉伐鮮虞為狄之則荀吳帥師何以不外之也以此知詳略之異非褒貶所繫

仲孫蔑叔孫僑如帥師侵宋

或問魯侵宋何也曰上三年嘗會宋衛同伐鄭矣次年宋使華元來聘通嗣君矣又次年魯使仲孫蔑報華元矣是年冬鄭伯背楚求成于晉而魯衛與宋又同盟于蟲牢矣今而衛侵宋魯又侵宋何也其諸受命於晉乎

其諸以諸侯謀復會而宋辭之乎然是役也二卿並書何也此與季孫行父臧孫許叔孫僑如公孫嬰齊四卿並書之意同當是時大夫專擅各自帥師而公家微矣是故侵宋之事小而專權之患大晉景公末年有二大盟會前有斷道後有蟲牢稍能振伯業者二會之力也然蟲牢之盟宋實與焉謀復會而宋辭之何哉其豈非以伯主於行事之間非純出於禮義有不當於人心者乎如齊桓首止之盟鄭伯逃歸未純乎義之所致也

宋公使公孫壽來納幣

或問納幣常事也何以書曰春秋書者三莊二十二年冬公如齊納幣公穀云公親納幣也啖子云且居喪娶仇女也文二年公子遂如齊納幣公羊云譏喪娶也趙子云又譏使公子納幣也成八年夏宋公使公孫壽來納幣趙子曰婚禮不當使公孫胡氏曰禮不可略亦不可過惟其稱而已略則輕大倫過則溺私愛宋公之請伯姬魯侯之嫁其女皆致其厚者也而不知越禮踰制

豈所以重大婚之禮也哉經悉書之為後法也愚案春秋書內女惟於紀叔姬宋共姬特致其詳非無謂也紀叔姬之歸于鄫宋共姬之待姆而卒皆有賢德者也是以魯人重之魯史記之為特詳聖人因魯史而紀之亦為特詳隱二年紀裂繻來逆女伯姬歸于紀七年叔姬歸于紀莊四年紀伯姬卒齊侯葬紀伯姬十二年紀叔姬歸于鄫莊二十九年紀叔姬卒葬紀叔姬書紀叔姬之詳如此成八年宋公使公孫壽來納幣衛人來媵九

年伯姬歸于宋夏季孫行父如宋致女晉人來媵十年  
齊人來媵襄三十年五月宋災宋伯姬卒秋叔弓如宋  
葬宋共姬書宋共姬之詳如此意者魯人以其賢而書  
之於冊故仲尼得以從而述之爾不然史之所不載仲  
尼亦安得而紀之乎然仲尼所以紀之者亦有故也其  
書公孫壽納幣季孫行父如宋致女則譏其使卿也書  
三國來媵則譏其諸侯一娶不應有十二女也蓋亦因  
其紀錄之詳而得以記其失禮爾

天子使召伯來賜公命

或問不書天王而書天子何也曰春秋書天王者二十  
三稱王者三而稱天子者二莊元年冬王使榮叔來錫  
桓公命文五年王使榮叔歸含且賵王使召伯來會葬  
及此年賜命是也說者曰桓公弑君而王不能討及其  
死而又使來錫命成風以僖公妾母用夫人禮而王不  
責反令榮叔歸含且賵又使召伯來會葬故皆去天以  
示貶焉又曰天王者制治天下而主乎法者也天子者

養天下而主乎恩者也。在詩賞善罰惡之事多稱王恩。賜燕好之事多稱天子。桓公篡弑之賊而來錫命則不能行王法。故王去天成公之立八年矣。未嘗有勤王之績而來錫命。則失於行私恩。故稱天子愚。請有以折之。春秋書來錫命。二王使榮叔來錫。桓公命天王使毛伯來錫。公命是也。來賜命者一。賜成公命是也。夫錫桓公命固不能行法。錫文公命獨為得禮乎。賜成公命固為失恩。錫文公命獨不為失恩乎。使榮叔歸成風之含貽。

使召伯會成風之葬固為非禮宰咺來歸仲子之賵獨  
非妾母乎王不去天何也說者曰名冢宰所以貶也然  
則榮叔獨不可貶乎豈歸仲子之賵罪在冢宰而不在  
天王乎歸成風之含賵罪在天王而不在榮叔乎凡此  
皆抵牾而難通者也然則如何杜預孫明復皆以王者  
之通稱過矣或者傳寫誤歟啖助呂本中之言云爾吾  
從之

衛侯之弟黑背帥師侵鄭

或問諸侯之弟兄不得以屬通君臣之義也來聘來盟書弟則齊年鄭語也帥師書弟則衛黑背也奈何曰說者或曰不書爵命氏族者未命也未命則一匹夫耳齊侯使其弟年來聘匹夫而代大夫之事也鄭伯使其弟語來盟匹夫而代諸侯之事也衛侯之弟黑背侵鄭匹夫而代諸侯之權也師者人之司命而治亂安危之所繫寄之匹夫焉亦已輕矣愚曰此說非也夫既命之盟聘帥師矣焉有非大夫而可以任國事哉其書弟者蓋

以見其私耳仁人之於兄弟也固親愛之而已矣然其待之過厚則亦非所以為中觀齊年之子無知僖公愛之衣服禮秩如嫡卒之弑諸兒者無知也衛侯之弟子叔黑背生公孫剽孫林父甯殖出衛侯衍而立剽亦以其父有寵愛之私故得立爾然則齊年鄭語衛黑背皆以弟書者豈非其寵愛之私聞於鄰國而史冊書之孔子因以記之乎若夫陳侯之弟黃出奔楚衛侯之弟鱣出奔晉天王殺其弟佞夫秦伯之弟鍼出奔晉陳侯之

弟招殺世子偃師盜殺衛侯之兄縶宋公之弟辰出奔陳宋公之弟辰自陳入于蕭以叛又自蕭來奔凡此者書之所以見其薄友愛之義爾一則已厚一則已薄聖人並書於冊而兄弟之義著矣

夏四月五卜郊

或問卜郊之屢何也曰魯僭天子之事以卜郊其言三卜者一襄七年是也四卜者二僖三十一年襄十一年是也五卜者一成十年是也屢卜而不吉則勿郊可也

公會晉侯伐鄭

或問經書晉侯而左氏云晉侯有疾晉立太子州蒲以爲君而會諸侯伐鄭信乎曰信經是矣

公會晉侯衛侯于瑣澤

或問瑣澤之會何也曰左氏云華元克合晉楚之成鄭伯如晉聽成會于瑣澤成故也劉敞云瑣澤之會本以合楚鄭也今楚鄭不至魯衛自盟何邪合晉楚者宋也宋亦不與又何邪凡晉楚爲平則應大合諸侯以申成

好今三國會而已又何邪然則傳之言未足信也愚意  
瑣澤之會為伐秦起文耳今年會于瑣澤明年春使卻  
錡來乞師而後五月暨諸侯伐秦比事而觀之可見矣

公如京師

或問公如京師豈非得禮之正乎曰經書朝于王所者  
僖公也如京師者成公也僖公朝王所為會晉耳成公  
如京師為伐秦耳非其尊周之本心也僖公二十八年  
書曰公會諸侯盟于踐土公朝于王所此年書公如京

師公自京師遂會諸侯伐秦春秋所誌可謂微而顯矣  
叔孫僑如如齊逆女僑如以夫人婦姜至自

齊

或問稱族尊君命舍族尊夫人信乎曰非也劉敞論之  
矣一事而再見者卒名之此春秋之常也非為尊君命  
故舉氏尊夫人故舍族也石氏曰婦有姑之辭時穆姜  
存焉與宣元年遂以夫人婦姜至自齊之義同

晉侯執曹伯歸于京師

或問執稱晉侯何也曰春秋書執多矣皆書人執諸侯亦書人略辭也亂辭也惟此年晉侯之執曹伯書晉侯傳曰負芻殺太子而自立晉侯執而歸于京師或者疑焉以為負芻之殺太子經無明文設有之春秋何以不書疑未得其實然嘗以春秋書法攷之則他執諸侯皆稱人其稱侯者獨此一事耳安得以為非伯討乎晉文之執衛侯亦歸于京師也然而猶稱人者晉文之執衛侯私意也此年之執曹伯伯討也此所以異其文傳之

所言與經意合益足以為證矣

宋殺其大夫山

或問山之不氏何也曰石氏曰殺大夫不氏楚得臣與  
宋山而已楚蠻荒也其略之不備宜矣此蕩澤之不氏  
左氏則以為背其族何休則以為譖華元發微則以為  
大夫之未命皆未當也蓋嘗疑其脫耳又左氏載宋華  
元之奔與子山之殺及魚石之出首尾不實學者更宜  
詳之

會吳于鍾離

或問鍾離之會吳何也曰晉實始通吳也向也為中國患者楚而已與中國盟會者亦楚而已未有吳也自成七年吳伐郟始見於經於是有吳為中國患矣自成十五年會吳于鍾離於是有吳與中國盟會矣鍾離之會猶以諸侯之大夫也若曰不以中國之諸侯與之為敵也襄五年善道之會猶大夫也戚之會祖之會則諸侯實與為會矣雖然以諸侯之大夫會吳猶可也又烏知

大夫之自為會可乎哉案春秋會而殊會者有二會王世子于首止是會世子也會吳于鍾離會吳于柤于向是會蠻荒也說者曰會世子于首止尊王室不敢與世子抗也會吳于鍾離于柤于向意在賤吳人而罪諸侯不能與敵也或曰其言會吳何會吳子也然以經攷之則戚之會曷為不外吳人又何以知吳之為吳子蘇氏曰吳子未嘗與中國會晉為之合諸侯而會之特書曰會吳于鍾離以吳與會也愚案此說為通蓋戚之會乃

諸侯會而吳人來會故序吳於諸侯之下鍾離之會乃  
吳未通中國而晉欲會吳故特以會吳為文然則曷為  
不與首止之文同義曰首止之文曰公及晉侯會王世  
子于首止若世子在此而諸侯往會之然尊世子也會  
吳之文曰叔孫僑如會晉士燮會吳于鍾離是其會晉  
士燮也為會吳爾

雨木冰

或問雨木冰之義曰文公經說曰成十六年雨木冰穀

梁曰雨而木冰也註云介冑之象何休公羊註云木少陽幼君也冰陰凝臣也臣將脅君此乃五行家牽合之說未可信終未見上溫下冷之意

公會尹子單子晉侯宋公衛侯曹伯齊人邾人伐鄭

或問或謂曹伯負芻弑君自立晉侯執之歸于京師次年曹伯歸自京師已而尹子單子會晉侯伐鄭曹伯遂列于會是王縱負芻以成曹亂故是年不書王言王之

不王也曰不然是年不書王脫文耳

楚子鄭伯伐宋宋魚石復入于彭城

或問伐宋以納魚石也而不曰納魚石何也曰納公孫  
寧儀行父于陳則納之者楚子耳非公孫寧儀行父之  
能為也今曰宋魚石復入于彭城則納之者雖楚子而  
復入則魚石也其諸晉欒盈之儔乎先儒曰以惡曰復  
入是故魚石不言自楚欒盈不言自齊

春秋或問卷十六

欽定四庫全書

春秋或問卷十七

宋 呂大圭 撰

襄公

城虎牢

二年

或問陳君舉曰向也曰虎牢今也曰城虎牢何不繫之鄭者為天下城之也繫之鄭者為鄭戍之也是故楚丘不繫之衛緣陵不繫之杞梁山沙鹿不繫之晉皆非一國之辭也邾郚郛繫之紀彭城繫之宋皆一國之辭也然乎曰說亦巧矣然案春秋楚丘不言衛緣陵不言杞

皆是衛杞不能有之而齊桓城之爾然則城虎牢者亦鄭不能有之爾此必近楚之地而鄭不能有之是以諸侯城之

莒人滅鄆

或問穀梁曰莒人滅鄆非滅之也立異姓以蒞祭祀滅亡之道也公羊亦云莒女有為鄆夫人者而立其出信乎曰未可以為信也此直是莒人滅鄆耳立異姓之事未敢盡信

季孫宿如晉

或問左氏曰晉人來討曰何故亡鄆為魯當屬鄆故也  
信乎曰以經攷之則莒與鄆同預戚之會莒之滅鄆正  
晉之所當討於莒也而反討於魯何哉恐未必然

鄭伯卒于鄆

或問鄭伯之名何也曰諸侯不生名此其名之者以其  
卒也與吳子遏伐楚門于巢卒同從省文也諸侯卒於  
國都不地此其地者以其不在國也為如會而卒也故

地與宋公佐卒于曲棘同未見諸侯而卒與許男卒于師同此諸侯之例如此而說者徒見其文之異便有鄭伯見弑之說誤矣

同盟于戲

或問戲之盟鄭服乎曰案左氏同盟于戲鄭與焉然柯陵之盟亦書於伐鄭之後則鄭之服未可知今以經攷之盟于柯陵之後諸侯再伐鄭則其未得志於鄭可知盟于戲之後楚子伐鄭則其為鄭服可知十一年同盟

于亳城北亦鄭受盟也會于蕭魚亦鄭預會也皆書於  
伐鄭之後比事而觀可見矣

會于蕭魚

或問蕭魚之會非悼公之盛乎曰此悼公之盛也而君  
子亦有不滿焉何以言之甚矣悼公再伯之難也晉楚  
所爭者二其一陳也其一鄭也悼公紹文襄之烈凡有  
盟會諸侯麇至向也鄭從楚至城虎牢而鄭始服向也  
陳從楚至盟雞澤而陳來會自是陳鄭即中國矣而楚

之讎於陳鄭者亦如是是故再會于戚為戍陳也而楚公子貞為是伐陳諸侯於是有救陳之師又明年而公子貞圍陳諸侯於是有鄒之會凡以爭陳也鄭侵蔡而獲變則楚伐鄭鄭受盟于楚則晉伐鄭鄭同盟于戲則楚伐鄭鄭為楚伐宋則晉又伐鄭諸侯戍鄭虎牢則楚救之鄭公孫舍之侵宋則晉伐之鄭同盟于亳城北則楚師至楚子鄭伯伐宋則晉師來凡以爭鄭也然而陳卒從楚而晉不能爭鄭卒從晉而楚不能爭何也無他

鄭近晉而陳近楚也觀范宣子之言曰楚人討貳而立  
子囊必改行而疾討陳陳近於楚民朝夕急能無往乎  
有陳非吾事也無之而後可吁此晉之所以不能爭陳  
歟觀子展之謀曰吾與宋為惡諸侯必至吾從之盟楚  
師至吾又從之則晉怒甚矣晉能驟來楚將不能吾乃  
固與晉吁此楚之所以不能爭鄭歟夫惟陳近於楚而  
民朝夕急也故其望於晉也緩夫惟晉能驟來而楚將  
不能也故其從於晉也急自鄒之會陳侯逃歸而中國

之會盟不復有陳自蕭魚之會鄭伯實與而楚之威令不能行於鄭者二十年由此故也夫以悼公再伯之烈其所可稱道者不過蕭魚之會而止以盟則不能如屈完之來以服其心以戰則不能如城濮之師以讐其氣然以荆楚方強子囊為政而凜然有憚晉之心雖或時帥師徒以示不怯而卒不敢以陵駕中國者豈無故哉觀子囊之言曰今吾不能與晉爭晉君類能而使之舉不失選官不易方其卿孫於善其大夫不失守其士競

於教其庶人力於農穡商工阜隸不知遷業君明臣忠  
上孫下競當是時也晉不可敵然則晉悼之所以能服  
楚者固有道矣然嘗評悼公之伯而獨於會吳之事深  
不滿焉悼公之所以急於會吳者固將以撓楚也然吳  
猶楚也急於為撓楚之謀而不知適以啓吳人之釁楚  
患雖微吳憂方大異時駸駸強盛以至於黃池之會儼  
然為兩伯以臨諸侯而春秋終矣是悼公之為也不亦  
可惜也哉抑悼公之所以為大失者尤在於大夫之專

也雞澤之會諸侯實在而使大夫盟甚至邢丘之會大夫得以會諸侯而向之會則直以大夫而已以悼公之賢而不能抑大夫之專又從而張之是將誰咎哉至於鄆嘗預會而聽莒人之滅鄆莒魯同盟而不恤莒人之讎魯進世子光於諸侯之上而不知班序之亂要皆未純乎王道者無他急於得陳則不暇恤大夫之專盟幸莒已服則不暇恤鄆魯之怨喜齊世子之先至則雖躋之諸侯之上不顧也蓋其設心措慮全在制楚而其他

皆未之及此所以不能如桓文之盛歟

劉夏逆王后于齊

或問劉夏何以名曰任氏曰天子之公當書公如宰周公是也卿當書伯如名伯毛伯是也大夫當書字如宰渠伯糾是也惟士則書名如宰咺之類是也劉夏書名士也

大夫盟

或問書大夫盟何也曰胡氏曰牡丘之會諸侯既次于

匡則書曰公孫敖帥師及諸侯之大夫救徐雞澤之會  
諸侯既盟而陳侯使袁僑如會則書曰叔孫豹及諸侯  
之大夫及陳袁僑盟今溴梁之會諸侯皆在是若欲使  
大夫盟者則宜書魯卿及諸侯之大夫盟可也而獨書  
大夫何也諸侯失政大夫皆不臣也上二年春正月會  
于向十有四國之大夫也夏四月會伐秦十有三國之  
大夫也冬會于戚七國之大夫也此三會皆國之大事  
也而使大夫專之諸侯皆不與焉是列國之君不自為

政禮樂征伐已自大夫出矣况悼公既沒晉平初立無先公之明也君若贅旒而大夫張亦宜矣夫豈一朝一夕之故哉善惡積於至微而不可掩常情忽於未兆而不預圖荀偃怒大夫盟而晉靖公廢趙籍韓虔魏斯為諸侯之勢見矣有國者謹於禮而不敢忽此春秋所以待後世之意也

邾庶其以漆間丘來奔

或問左氏三叛人名之說信乎曰春秋書以地來奔者

三今年庶其昭五年莒牟夷三十一年邾黑肱是也又臣之奔必適讎國樂盈之奔也必楚秦鍼之奔也必晉而庶其之奔也必魯豈非以南鄙之怨歟魯之於邾也既執其君取其田又伐其國而又納其叛人甚矣學左氏者曰求名而亡欲蓋而彰齊豹書盜求名而不得也三叛人名欲蓋而彰者也有此二物足以懲肆而去貪也為此言者以為學左氏則可以為學春秋則不可

九月庚戌朔日有食之十月庚辰朔日有食

之

或問九月食而十月又食何也曰石氏曰此年九月日食十月日食二十四年七月八月日食食之變起於交也有雖交而不食者春秋二百四十二年而食纔三十六也有頻交而日食者此年及二十四年三年之內連月而食者再也諸儒以為歷無此法或傳寫之誤然漢高之時亦有頻食者二年十月十一月天道至遠不可得而知後世執推步之術案交會之度而求之亦已難

矣

豹及諸侯之大夫盟于宋

或問宋之盟非弭兵乎曰否宋之盟是天下之大變也  
晉楚之爭諸侯也久矣諸侯之從晉者楚伐從楚者晉  
伐天下亦多故矣雖然晉之為中國盟主則自若也宋  
之會名曰弭兵而以晉楚之從交相見自是晉楚夷矣  
魯自僖公以來雖貳於楚而未嘗一迹其國自盟宋之  
後明年如楚踰年乃至春秋備書之以見中國諸侯之

事楚猶事晉矣向也不過陳鄭蔡從楚耳無他近楚之國也今也魯衛宋均於事楚矣自是再會于虢至申之會而蠻荆之君大合十一國之衆而楚專主諸侯矣故曰是天下之大變也據左氏所載則宋之盟楚實先晉而春秋書晉於楚之上者所以存中國之體也或問渙梁之盟書曰大夫盟言大夫之無諸侯也宋之盟書曰諸侯之大夫不與大夫之無諸侯也此其說失之鑿矣案渙梁之盟中間無他事先序諸侯於其上矣故但曰

大夫盟宋之盟中間有衛侯殺甯喜弟鱄奔晉之事故再舉諸侯之大夫此書法也雞澤之盟亦中間無他事而書諸侯之大夫及袁僑盟何也曰雞澤之盟諸侯不與盟若但曰叔孫豹及大夫及袁僑盟則不辭矣故書曰諸侯之大夫此自書法云爾何必過為之說哉

十有二月乙亥朔日有食之

或問左氏再失閏之說信乎曰劉氏權衡曰左氏云於是辰在申司歷過也再失閏矣明年春無冰杜氏曰頓

置兩閏以應大正故正月建子得以無冰為災皆不然也  
厯家之術求閏餘易求交朔難今司厯能正交朔反不能置閏乎此非人情也閏有常準率三十二月必一逢之如傳所言再失閏者則司厯廢閏殆七十月彌五年矣亦非人情也頓置兩閏詭聽駭俗亦非人情也且必若所云其亂天時多矣春秋何以不譏乎故曰未然

十二月甲寅天王崩乙未楚子昭卒

或問杜預謂十二月無乙未信乎曰呂本中曰甲寅乙

未相距四十二日明閏月之驗然不書閏月者承前月而受其餘日故書閏月之日係前月之下史策常體又有定例故不必每月發傳此范甯之說也然杜預以十二月無乙未日誤矣蓋預專據左氏說經二十七年十一月乙亥朔日有食之左氏以為辰在申司歷過也再失閏矣二十八年春無冰杜預以為前年再失閏頓置兩閏故此年正月得以無冰為災而書而孔穎達正義又以為甲寅乙未不得同月是皆不知閏月之日係於

前月之下史策常體之法也

天王殺其弟佞夫

或問天王亦不得專殺乎曰呂本中曰言殺其弟無親親之恩也孫明復曰春秋之義天子得專殺故二百四十二年無天子殺大夫之文此年殺其弟佞夫以為天王不能容一母弟不可不見也某竊以為明復此言未為知春秋者也夫所謂諸侯無專殺大夫者必稟命於天子也天子無所稟命有罪則與衆殺之非謂殺生自

恣悉由已出而謂之專殺也春秋偶無天王殺大夫之事耳或史官脫略孔子無從取書也如使實殺無罪見之簡冊聖人豈肯不書以為世戒之理而以為天子可以專殺大夫而遂不書也使後世暴君有作殺生自恣無所忌憚由明復此言也予故以為明復此言未為知春秋

葬蔡景公

或問君弑而賊不討則不書葬蔡景公書葬何也曰呂

本中已言之矣呂曰許止蔡般皆以子弑父臣弑君罪惡之極也而二君皆書葬則是君弑而賊不討不書葬者本無是說也而為之說者又必曲為之義以信其說使聖人之意不明亦聖門之罪人也

春秋或問卷十七

欽定四庫全書

春秋或問卷十八

宋 呂大圭 撰

昭公

莒去疾自齊入于莒莒展興出奔吳

元年

或問經書小白係齊則糾不書子忽係之鄭則突不稱國明無二君也而莒之去疾展興皆係之莒或謂貴賤鈞而後得以爭信乎曰此說非也假使其貴賤鈞亦當有當立者不可以貴賤鈞為辭意者去疾係莒則是去疾長而展興少也去疾當立明矣然自密州既弒之後

去疾即奔齊而莒人固已立展與矣則其係展與以莒也亦宜入于莒難辭也展與雖已立為君而未踰年則猶未成乎君故不稱君而但曰莒展與耳然則聖人所書莒事蓋兩下爭國之辭也

楚子麇卒

或問楚子麇卒非弑乎曰呂本中曰經書楚子麇卒而左氏以為公子圍弑之至誅慶封則左氏穀梁又載慶封稱圍弑君之語後世緣楚王汰侈遂以為實甚矣三

傳之為經害也趙盾弑其君曰非盾也穿也許止弑其君曰不嘗藥也鄭伯髡頑如會未見諸侯而卒而曰子駟弑之也凡若此類皆誣偽失實重為經害使聖人之旨不明害之大者也陸淳以為穀梁所稱季孫行父禿晉卻克眇衛孫良夫跛曹公子首僂同時而聘于齊齊侯使禿者御禿者眇者御眇者跛者御跛者僂者御僂者以此語為街談巷議之說又以垂隴之會鄭公子賦詩左氏委曲誣辭為多此類是也淳之論蓋有未盡大

抵公穀之論多街談巷議之說而左氏之說多委曲誣辭也其可信蓋鮮矣學者欲由是而求聖人之意則惑之甚也

公如晉至河乃復

或問公如晉乃復何也曰經書公如晉至河乃復者六此年及十二年公如晉至河乃復十三年公如晉至河乃復二十一年公如晉至河乃復二十三年公如晉至河有疾乃復定三年公如晉至河乃復惟二十三年書

有疾則其餘乃復者皆晉人辭之也春秋之世以小國事大國無歲不聘無役不從靡敢寧居如此然經書如晉而復者六而昭公居其五則亦足以見昭公之舉動不以禮而自取困辱可知然則為國者亦謹於禮而已矣

### 暨齊平

或問暨與及之辨曰案定公十年經書及齊平而此年書暨齊平先儒謂及我欲之暨不得已也愚曰不然及

固我及彼之辭而暨之為言又有強之其意何以言之  
是時魯方結婚於吳外附強楚倚吳楚以為重是以強  
齊人而與之平齊亦不得已而從之與宋公之弟辰暨  
石彊出奔義同至於定公十年及齊平則我及彼之辭  
也杜預以此為齊與燕平誤矣上文書暨齊平下文書  
叔孫婁如齊涖盟此其驗也亦猶定十一年冬及鄭平  
叔還如鄭涖盟爾

定十一年

奈何以為燕齊平乎

葬陳哀公

或問葬陳哀公我往會乎曰黎氏曰書葬陳哀公非謂  
我往會而書時陳已滅矣國為楚師入據魯豈於其葬  
而使人往會之蓋楚師入陳時其君在殯因取而葬之  
與莊四年齊侯葬紀伯姬同彼目齊侯者蓋上文無齊  
侯滅紀之文故下必云爾今已書楚師滅陳則下云執  
公子招殺陳孔奐葬陳哀公皆蒙上文爾

楚子虔誘蔡侯般殺之于申

或問楚子虔何以名曰諸侯不生名非失國也非爭國

也則不名而楚子虔衛侯燬名此學者所以深求其說而不得也或曰衛侯使禮至仕邢既而伐之禮至從國子巡城披而殺之於外是懷詐以滅人也蔡般弑君父而立楚靈王不能聲其罪而討乃包藏禍心甘言重幣以誘而殺之遂滅其國此二者皆聖人之所甚惡也是以特名之為此說亦近似矣愚嘗思之竊謂聖人之作春秋不以名字為褒貶也諸侯不生名卒則名失國則名爭國則名見滅則名皆所以別也初非有褒貶於其

間也後世之儒以名字為褒貶而後聖人之意愈不可見矣自其以名字為褒貶也至於質之經而不合則必曲為之說以通之故治春秋者多失之鑿且如衛侯燬滅邢漢儒有滅同姓則名之說然以經攷之則諸侯之滅同姓者多矣何以皆不名而獨名衛侯邪至於楚子虔則滅同姓之名又不通矣謂其誘而殺之故名之邪則楚子之誘戎蠻子亦誘之也又何以不名說者又曰以荆蠻誘戎蠻猶可也以荆蠻誘中國不可也此言近

矣然觀聖人所書以誘稱之固所以著楚子之罪矣又豈以內外之分而有異乎然則衛侯燬滅邢之所以名皆衍字耳先儒或謂衛侯燬滅邢之下有衛侯燬卒恐因此而訛遂以滅邢之上亦加燬字此言是也愚謂楚子虔亦恐後儒於蔡侯般之上見其不應名般而不名虔故加一虔字不知蔡侯般之所以名非以罪般也此與胡子髡沈子逞徐子章禹沈子嘉胡子豹蔡世子有潞子嬰兒同一例耳

齊高偃帥師納北燕伯于陽

或問納者不宜納也信乎曰春秋書納者六皆用師以納之莊九年公伐齊納糾伐而納之也僖二十五年楚人圍陳納頓子于頓圍而納之也文十四年晉人納捷菑于邾則趙盾帥師以納之也其書晉人者以其弗克納而略之也宣十一年楚子入陳納公孫寧儀行父于陳則以楚君之重楚師之衆而納之也昭十二年春齊高偃帥師納北燕伯于陽哀二年晉趙鞅帥師納衛世

子蒯瞶于戚則以帥師而納之也凡言納者內弗受而強致之辭此蓋內無有為之助而自外用勢力以納之耳說者曰納者不宜納也此言過矣以北燕伯觀之書之曰北燕伯則是燕之君也與入于夷儀同豈有不宜納者邪諸侯之入其國有書入者有書歸者有書納者歸易辭也入難辭也納者內莫為助之辭也

有星孛于大辰

或問星孛于大辰亦有應乎曰胡氏曰大辰心也心為

明堂天子之象其前星太子後星庶子孛星加心象天子嫡庶將分爭也後五年景王崩王室亂劉子單子立王猛尹氏召伯立子朝歷數載而後定至哀十三年有星孛于東方不言宿名者不加宿也當是時吳人僭亂憑陵上國日敝於兵暴骨如莽其戾氣所感固將壅吳而降之罰也故氛祲所指在於東方假手越人吳國遂滅天之示人顯矣史之有占明矣愚案左氏載梓慎鄭裨竈之言則曰宋衛陳鄭將同日火而明年其言果驗

何休註公羊則謂李彗者埽故置新之象是後周分為  
二天下兩主較之胡氏之言則又有異故知說春秋而  
以某事驗某應者皆失之泥也呂本中曰日月星辰之  
謫見於天雪霜風雨之不時以為民害皆政事之失當  
有以取之也故君觀其變以思戒察其祥以改行則災  
害可息而無危亡之禍其漠然不以為意則禍及之非  
不幸也聖人詳書以為世戒為人君者觀春秋所書其  
可不致懼乎斯言當矣



而固亦書葬邪予觀許悼公弑而書葬者非他蓋變生於內而不及國又般止欲沒其弑逆之迹具禮葬其父我有使往故書葬焉歐陽公論止為弑得其旨矣

盜殺衛侯之兄繫

或問左氏求名不得之說信乎曰為左氏之說者曰或求名而不得或欲蓋而名彰齊豹為衛司寇作而不義其書為盜邾庶其莒牟夷邾黑肱以土地出求食而已不求其名賤而必書此二物者所以懲肆而去貪也夫

齊豹書盜則曰求名而亡三叛人名則曰欲蓋而彰一則以書名為欲蓋而彰一則以不書名為求名而亡如是用法誰能曉之余以為此非春秋之旨也案春秋書盜五襄十年盜殺鄭公子駢公子發公孫輒昭二十年秋盜殺衛侯之兄縶定八年盜竊寶玉大弓哀四年盜殺蔡侯申十三年盜殺陳夏區夫是也凡書盜者微者之名字不著於經也陸淳以為春秋非上卿不書名陳傅良云此齊豹也曷為以賤辭書之奪之書寇則非大

夫也理或然也

大蒐于昌閒

或問大蒐禮乎曰胡氏曰昭公之時凡三書蒐或以非其時或以非其地而大意在權臣專行公不與焉三綱軍政之本古者春蒐夏苗秋獮冬狩皆於農隙以講事而所主者明貴賤辨等列順少長習威儀則皆納民於軌物而非馳射擊刺之末矣是故觀於有莘少長有禮知可用也而文公遂伯臨於洛陽袒而發喪為義帝也

而漢祖遂王今魯國其君則設兩觀乘大輅其臣則八佾舞於庭旅泰山以雍徹其宰則據大都執國命而軍政之本亡矣何以蒐為此春秋所書為後戒之意也

蔡侯東國卒于楚

或問蔡侯朱穀梁以為蔡侯東何也曰前書蔡侯朱出奔楚而此書蔡侯東國卒於楚穀梁以朱為東愚謂穀梁所書疑是又脫一國字耳何者朱無歸入卒葬之文而東國無出奔之事疑只是一事

公孫于齊

或問公孫于齊之義曰胡氏曰昭公以君伐臣曷為不勝乎魯自東門遂殺嫡立庶魯君於是乎失政祿去公室政在季氏於此君也四公矣作三軍盡征其一舍中軍兼有其二民賦入於其家半矣受命救台也遂入鄆帥師取卞也不以聞軍政在其手專矣行父片言而東門氏逐南蒯一動而公子慙奔魯之羣臣亦無敢忠於公室而獻謀者所謂屯難之時也在易屯之六五曰屯

其膏小貞吉大貞凶象曰屯其膏施未光也昭公不明  
乎消息盈虛之理正身率德擇任忠賢待時循致不忍  
一朝之忿求逞其私欲而以羣小謀之其及也宜矣石  
氏曰天下有道則禮樂征伐自天子出天下無道則禮  
樂征伐自諸侯出自諸侯出蓋十世希不失矣自大夫  
出五世希不失矣又曰祿之去公室五世矣政逮於大  
夫四世矣自周東遷天子始失政而諸侯專專自魯隱  
始自隱至昭凡十世矣自東門襄仲殺惡及視魯國始

失政而大夫專專自宣公始由宣至定凡五世矣自季  
文子武子秉魯以至平子又四世矣此宣公之末年歸  
父欲去三桓張公室而未能也自是以來魯君世從其  
失季氏世修其勤史墨所謂民不知君何以得國而樂  
祁子家駒亦謂魯君失民季氏得衆之久也政在季氏  
已四世矣魯君喪政已四公矣而區區稠父而欲同諸  
大夫去之不亦妄乎此宜其所以見逐也

會于適歷

或問季孫意如會晉荀躒而晉無討焉何也曰余觀意如逐君昭公在外始依於齊而齊不果納再依於晉而晉不果受卒之客死於外未嘗不歎世道之薄而亂臣賊子之無所懼也夫以臣逐君意如之罪易見也昭公奔愬二國其意亦可矜也苟有人心者孰不憤意如之為而感昭公而况齊晉乎齊大國也郭陵之會四國同之伐季氏以納昭公何不可之有而所以不克納公者則以梁丘據之受賂也晉盟主也扈之會六國同之伐

季氏以納昭公尤易為力而所以不克納者則以士鞅之取貨也自其為義之心不勝其貪利之心而後其為義者始不勇矣此齊晉納公之謀所以姑為之名而卒之悠緩而卒不克歟嗚呼世道之薄有自來矣魯桓弑隱者也以許田賂鄭而會于垂公子馮弑與夷者也以郕大鼎賂魯而平其亂宣公弑君自立則賂齊以濟西之田而安其位崔杼弑其君光則賂晉侯以宗器樂器及其大夫軍將皆有賂而退其師凡若此類不勝衆矣

況夫以齊侯有納公之志而又有母受魯貨之命盟主  
為諸侯之會而宋衛皆有利納公之心此豈非其好義  
之心哉然自申豐之計一行而齊君有感志季孫之貨  
一至而小國以難辭三軍在途諸侯在會是區區者乃  
能劫而奪之刎而止之此亂臣賊子所以接踵於後世  
歟雖然非徒以其貨利之行而已也觀晉侯欲以師納  
公而士鞅使人私於意如則其互為唇齒相為囊橐久  
矣當是時晉之六卿猶意如也晉君亦昭公也其肯併

心一意以誅其臣而納其君哉宜晉侯之不得以行其志也

春秋或問卷十八

欽定四庫全書

春秋或問卷十九

宋 呂大圭 撰

定公

不書正

元年

或問定公何以不書正月曰定公不書正先儒以為昭不得正其終定不得正其始理固如此然以予觀之正者天子之正朔也天子頒之諸侯諸侯受而頒之於其國故於人君即位之始皆書王正月以見其受正於天子也今定不書正月似非正終正始之義蓋是年昭公

已薨而定公未立在禮先君既終而嗣君繼世不可以  
一年而二君故以先君之末年猶繫之先君至明年而  
後繫新君之元年此書法也昭以十二月薨則今年之  
春不得以繫之先君之末年矣而定公又以六月而後  
即位故今年春不得如他君之例而繫以王正月以比  
常年書王三月云爾觀聖人所書六月癸亥公之喪至  
自乾侯所謂公者昭公也戊辰公即位所謂公者定公  
也則是定公未即位之前猶是昭公之魯定公既即位

然後追書今年春皆為定公元年耳此則所謂一年而  
二君也至於公即位之例先儒或以為繼弑君不言即  
位其或繼弑君而言即位則曰如其意也此殊不可曉  
皆強為之辭耳觀定公六月即位之例則知諸君之所  
以書即位者行即位之禮也其不書即位者不行即位  
之禮爾尚何疑乎

會于召陵侵楚

或問召陵之會卒無成功何也曰余觀召陵之會未嘗

不嘆晉之可以復伯而失其機也夫蔡陳鄭許沈頓胡  
蓋服役於楚者也而皆與於會則蓋病楚而歸晉也晉  
自平丘以來不能合諸侯者二十四年矣今而上致劉  
子下合十七國之君以為此會齊桓之師不如是之盛  
也然而齊桓之師書曰伐楚盟于召陵晉定之會書曰  
會于召陵侵楚侵淺事也伐重事也晉合十七國之君  
以會于召陵徒能侵楚而已是不足與有為也晉自是  
無復宗諸侯之望矣案傳則楚子常以襄馬而失二國

之君晉亦以荀寅求貨之故而辭蔡侯世衰道微是區區者乃能軒輊列國之諸侯而致晉楚之失伯者皆是物也嗚呼可勝嘆哉可勝嘆哉故自是以後前乎此自齊桓以來無特相盟者而盟于鹹于沙則特相盟矣無參會者而安甫之會則參會矣前此晉未嘗伐與國也而晉士鞅帥師侵鄭侵衛又伐衛則伐與國無伯主之體矣及其極也荆蠻橫行於中國而莫之制矣故嘗攷論春秋二百四十二年之事以為北杏以前是一時也

北杏以後是一時也召陵以前是一時也召陵以後是  
一時也北杏以前諸侯無伯故有特相盟者有參盟參  
會者有相攻伐者北杏以後則異是矣召陵以後諸侯  
亦無伯故亦有特相盟者有參盟參會者有相攻伐者  
召陵以前則異是矣天下之有伯非美事也天下之無  
伯非細故也夫伯者王之反也有伯則無王矣名曰尊  
周而實奪其權北杏以前天下未知有伯也而猶知有  
王北杏以後天下惟知有伯矣此豈美事哉雖然有伯

者在焉則諸侯猶有所附中國猶得以安強暴猶知所畏是猶幸其有伯也伯衰而諸侯散伯衰而中國擾伯衰而吳楚橫天下益不寧矣是故晉侯吳子會于黃池而春秋終焉

齊人歸田 墮費墮郈

或問或謂左氏穀梁所載夾谷之會孔子之辭皆街談巷議之說以為知聖人也淺其說然乎曰以愚觀之左氏所載似未可不信揚子法言曰齊人章章歸其侵疆

蓋自漢儒相傳皆有是說似未可非之要之聖人舉事自是與常人別所謂綏之斯來動之斯和也夾谷一會而侵疆遽歸豈謂其一言之間遂足以致此哉意其動容周旋之間有以深警其心矣則夫齊人之來歸田宜也墮三都之事東坡蘇氏為之論曰季氏親逐昭公客死於外從公者皆不敢入孔子安能以是墮其名都而出其藏甲也哉攷於春秋方是時三桓雖若不說然終莫能違孔子蘇氏曰此孔子之所以聖也孔子以羈旅

之臣得政暮月而能以治世之禮律亡國之臣墮名都  
出藏甲而三桓不疑其害已此必有不言而信不怒而  
威者矣夫孔子之聖見於行事至此為無疑也愚謂審  
如蘇氏之說則是孔子為政能拂人情之所難而為之  
要之聖人舉事雖即諸天理之安而亦未嘗不順人情  
之欲夫使孔子拂三桓之欲而強欲墮其都邑此不待  
智者而知其不克也然則費郈之所以墮者何也曰三  
家之城其邑者將以自利也而家臣據其邑以叛亦豈

三家之利哉南蒯叛侯犯叛公山不狃叛叛者相踵豈  
惟魯國惡之三家亦惡之矣孔子順天理而言之而適  
有以動乎三家之心故其墮郈墮費者二家之自墮也  
於仲尼何與焉乃若成邑不墮而至於圍則孟孫之不  
欲墮耳夫二家聞夫子之言而墮其邑者是其天理之  
動也孟氏聞公歛處父之言而不肯墮者是其人欲之  
蔽也天理之動不足以勝其人欲之蔽然後不肯墮耳  
然使孔子得志以行乎魯國則將有不待兵革而自墮

者如魯之不終用孔子何胡氏以為圍成之後然後孔子攝相事理或然也或謂史記所載未必得其實孔子為政當在歸田墮郈之時而圍成不克則是女樂既歸之後此說未必然姑記之以俟知者

晉趙鞅入于晉陽以叛晉趙鞅歸于晉

或問趙鞅書歸何也曰案先儒之說云出稱叛入稱歸叛者逆辭歸者順辭則知鞅之叛非叛也以地正國也所以逐君側之惡人也鞅取晉陽之甲以逐君側之惡

人而不免以叛書者所以為後世人臣不請命於君而擅用兵者之防也至其入國則書歸以見鞅之非逆也或者又曰春秋以法治人而以情恕之先書叛叛惡辭所以誅鞅也後書歸歸善辭所以赦鞅也鞅之出入于晉陽將以禦荀寅士吉射之伐耳其心本非叛君也然邑君之邑也臣烏得而有之故書叛以伸王法及其歸國則是鞅知悔而反逆為順復於為善也故書歸以厚人情先儒之為此論不過惑於書歸之一語耳夫使以

地正國而可則是人主可得而脅人臣擅興無罪而以兵諫者真愛其君也使後世賊臣稱兵向闕以誅君側為名而實欲脅君取國者則此說啓之也春秋王法也當誅則誅當赦則赦烏有既誅而又赦之之理若使既誅而又赦之則是非不白善惡不明而王法不行於天下矣況春秋乎愚故曰歸易辭也亂臣以叛去而其歸也無異於善復者以是為晉國之無政刑也

春秋或問卷十九

欽定四庫全書

春秋或問卷二十

宋 呂大圭 撰

哀公

晉趙鞅帥師納衛世子蒯瞶于戚

二年

或問蒯瞶何以稱世子曰左氏序蒯瞶之事曰蒯瞶欲殺夫人夫人啼而走劉原父以為安有此事蓋蒯瞶聞野人之歌其心慙焉則以謂夫人夫人惡其斥己淫則啼而走言太子將殺予以誣之靈公惑於南子所言必聽彼不恥召宋朝固亦不難於逐蒯瞶矣此其真也不

當如左氏所記又蒯瞶出乃奔宋宋南子家也蒯瞶負殺母之名而又走入其家豈真有此事哉愚以春秋攷之則知劉敞之言為得若使蒯瞶欲殺夫人則是以子而欲殺母也以子而殺其母則父子之義絕矣出奔不復乃理之宜及其納于戚聖人不應以衛世子書之聖人書之以為衛世子則是蒯瞶世子之位未絕也蒯瞶世子之位未絕則知其必無欲殺母之事明矣案春秋書世子者三鄭忽蔡有衛蒯瞶三者所書一同突雖立



用田賦

或問用田賦之說曰春秋書變古者三初稅畝作丘甲用田賦是也先儒言初稅畝謂公田十一之外履其餘畝而稅之也如是則是公田之助既十取一矣又於其餘田而十取一也是為十取二愚謂初稅畝乃是初變古法也恐未應遽至此所謂初稅畝只是廢助法而用稅法耳宣公之三十六年書饑七年書大旱十年大水而復大饑十三年螽十五年復螽水旱凶荒相繼不絕

則公田之入薄矣於是廢助法而用稅法則歲取十一  
以為常所謂凶年糞其田而不足必取盈者是也此譏  
變法之始也故書初作丘甲之說先儒或以為古者四  
丘為甸甸出甲士三人是一甸而出一乘車也今丘十  
六井也而同為甲是丘賦一乘也若然則頓增四倍之  
賦於理亦未宜然故夫丘甲只是每丘而出一甲士耳  
至於用田賦之說先儒或謂宣公稅畝始什二而稅今  
又什二而歛其財曰用田賦者言用田以為財賦之率

也果如是則四倍於古矣亦恐非也或謂以丘賦一乘為未足故又以田賦之田賦之者家一人以為兵也然九夫為井四井為邑四邑為丘四丘為甸古者甸出革車一乘則是五百七十六夫而出七十五人也今又不足而以田賦則是凡受田者皆出一人以為兵比之於古則已七倍矣亦恐加兵不至如是之甚賈逵以為使一井之間出一丘之賦則是多於常賦十六倍於理亦不宜然案左氏季孫欲以田賦使冉有訪諸仲尼仲尼

曰君子之行也度於禮施取其厚事舉其中歛從其薄如是則丘亦足矣若不度於禮貪冒無厭則以田賦又將不足愚謂丘賦者即丘十六井出戎馬一匹牛三頭是賦之常法也所謂以田賦者蓋於丘賦之外又計田而出賦也田出稅丘出賦初稅畝則無寬弛之法稅且重矣作丘甲則有益兵之擾賦又重矣今日用田賦則是丘既出賦而田又出賦也田出稅矣今又出賦所謂取二也然賦有二有軍賦有財賦四丘為甸甸出革車

一乘此軍賦也周禮九賦之法此財賦也二者皆賦於民故均謂之賦所謂用田賦者恐是計田而出財賦耳孔子謂計丘而出軍賦矣則又不應計田而出財賦也要之重賦爾

蝨

或問冬十二月蝨左氏失閏之說信乎曰案左氏載仲尼之言曰火伏而後蟄者畢今火猶西流司厯過也以是為失閏之故然觀今年書十二月蝨明年九月蝨又

十二月螽恐不專為失閏然則何以書紀災也

公會晉侯及吳子于黃池

或問春秋書吳事但書曰吳而已而書吳子者三何也  
曰其來聘則以吳子使而書之也以其與我接也戰于  
柏舉則以蔡侯以吳子而書之也書吳子則吳楚敵也  
會于黃池則以晉侯會吳子而書之也書吳子則吳晉  
敵也凡皆著其強也或以為吳能辭尊稱居卑稱則誤  
矣抑愚讀公會晉侯及吳子之言而有感焉春秋之作

託之魯者以魯有可以至道之資故也齊桓首倡伯業而魯之君獨遲遲而不會豈非其趨向之近正邪當時之善覘人國者不曰魯秉周禮未可動也則曰周禮盡在魯矣是魯之君臣猶知有典禮也中國之有伯雖王道之不幸也而猶世道之一幸也不幸而有楚而猶幸而有晉又不幸而有吳焉楚蠻也吳亦蠻也愈降而愈為中國患此正中國之諸侯之所宜同心勦力以附伯主而庶幾其足以息強暴之跋以為中國之防可也晉

既不足以宗諸侯而開門延盜以來被髮文身之吳於  
中國者乃在於周公之子孫禮義之望國會之伐齊而  
使之逞其志於中國者魯也會于黃池而使之偃然與  
晉伯為敵者亦魯也不惟依吳以為國而又導之至以  
陵中國之諸侯聖人望魯之意至是絕矣是故春秋於  
是終焉斯義也先儒偶未之及故發明之以俟知者

春秋或問卷二十

春秋或問跋

傳春秋者幾百家其說大抵以褒貶賞罰為主蓋三傳倡之而諸儒和之也惟朱文公以為不然今其載於門人之所紀錄者略見一二獨恨未及成書耳廣文呂先生加惠潮士諸士有以春秋請問者先生出五論示之咸駭未聞因併求全藁先生又出集傳或問二書蓋本文公之說而發明之有五論以開其端有集說以詳其義又有或問以極其辨難之指歸而春秋之旨明白矣

噫夫子之心至文公而明文公之論至先生而備先生  
亦有功於世教矣夢申預聞指教不敢私秘與朋友謀  
而鋟諸梓庶幾廣其傳云時寶祐甲寅正陽之月門人  
元公書院堂長何夢申敬跋

欽定四庫全書

春秋五論

宋 呂大圭 撰

論一

春秋之作何為乎曰春秋者扶天理而遏人欲之書也  
春秋魯史爾聖人從而修之則其所謂扶天理而遏人  
欲者何在曰惟皇上帝降衷于下民若有恒性而綏猷  
之責則后實任之堯舜禹湯文武達而在上所以植立  
人極維持世道使太極之體常運而不息天地生生之

理常發達而不少壅者為其能明天理以正人心也周  
轍東王政息政教失風俗壞修道之教不立而天命之  
性率性之道幾若與之俱泯泯昧昧而不存者君臣之  
道不明也上下之分不辨也夷夏之辨未明也長幼之  
序未正也義利之無別也真偽之溷淆也諸侯僭天子  
大夫僭諸侯而世莫知其非也臣弑君子弑父強并弱  
下篡上而世莫知其亂也其所施為盡反王制而失人  
道之正而世莫知其不然也孔子雖聖不得位則綏猷

修道之責誰實尸之然而不忍絕也於是以其明天理  
正人心之責而自任焉六經之書皆所以垂世教也而  
春秋一書尤為深切故曰我欲託之空言不如載之行  
事之深切著明也魯史之所書聖人亦書之其事未嘗  
與魯史異也而其義則異矣魯史所書其於君臣之義  
上下之分或未辨也而吾聖人則一正之以君臣之  
義上下之分內外之辨有未明者吾明之長幼之序  
有未正者吾正之義利之無別也吾別之真偽之溷淆

也吾明之其大要則主於扶天理於將萌遏人欲於方熾而已此正人心之道也故曰禹抑洪水而天下平周公懲荆舒驅猛獸而百姓寧孔子成春秋而亂臣賊子懼孔子成春秋不過空言爾而其功配於大禹及周公則豈非以其正人心之功尤大於放龍蛇驅虎豹之功乎故曰春秋天子之事也何者人性之動始於惻隱而終於是非惻隱發於吾心而是非公乎天下世之盛也天理素明人心素正則天下之人以是非為榮辱世之衰

也天理不明人心不正則天下之人以榮辱為是非世  
之所謂亂臣賊子恣睢跌蕩縱人欲以滅天理者豈其  
悉無是非之心哉故雖肆意所為莫之或制而其心實  
未嘗不知其非而惡夫人之議已此其一髮未亡之天  
理不足以勝其浸淫日滋之人欲是以迷而不復為而  
不厭而其所謂自知其非者終自若也則其心未嘗不  
欲紊亂天下之是非以託已於莫我議之地既上幸無  
明君為之正王法以定其罪而又幸世教不明人心不

正習熟見聞以為當然曾莫有議其非者則為亂臣賊子者又何其幸之又幸邪是故唐虞三代之上天理素明人心素正是非善惡之論素定則人之為不善者有不待刑罰加之刀鋸臨之而自然若無所託足於天地間者世衰道微天理不明人心不正是非善惡之論幾於倒置然後亂臣賊子始得以自容於天地之間而不特在於禮樂征伐之無所出而已也孔子之作春秋也要亦明是非之理以詔天下與來世而已是非者人心

之公理而聖人因而明之則固自有犁然當乎人心者  
彼亂臣賊子聞之固將不懼於身而懼於心不懼於明  
而懼於暗不懼於刀鋸斧鉞之臨而懼於倏然自省之  
頃不懼於人欲浸淫日滋之際而懼於天理一髮未亡  
之時此其扶天理遏人欲之功顧不大矣乎孟子斷然  
以為有一治之効蓋具有見乎此矣使先王之紀綱法  
度既已蕩然不存天子之禮樂征伐既已不能自制其  
所恃以僅不泯者獨有人心是非之公理耳而又顛倒

錯亂貿貿不明則三極果何恃以立人道果何恃而存乎此固春秋一書所以有功於萬世也自世儒不明乎孟子之說遂以春秋之作乃聖人賞善罰惡之書而所謂天子之事者謂其能制賞罰之權而已夫謂天子之事止於制賞罰之權而綏猷修道之責乃不暇問則是劉漢以後之天子而非唐虞三代之天子矣為是說者不惟不知春秋抑亦不知所謂天子之事也彼徒見夫春秋一書或書名或書字或書人或書爵或不書氏或

書氏於是為之說曰其書字書爵書氏者褒之也其書  
名書人不書氏者貶之也褒之故予之貶之故奪之予  
之所以代天子之賞奪之所以代天子之罰賞罰之權  
天王不能自執而聖人執之所謂章有德討有罪者聖  
人固以自任也春秋魯史也夫子匹夫以魯國而欲以  
僭天王之權以匹夫而欲以操天王之柄僭曰道之所  
在獨不曰位之所不可得乎夫子本惡天下諸侯之僭  
天子大夫之僭諸侯下之僭上卑之僭尊為是作春秋

以正名分而已自蹈之將何以律天下聖人宜不如是也蓋是非者人心之公不以有位無位而皆得以言故夫子得以因魯史以明是非賞罰者天王之柄非得其位則不敢專也故夫子不得不假魯史以寓賞罰是非道也賞罰位也夫子者道之所在而豈位之所在乎或曰夫子之為是也非以私諸已也夫子以魯有可以變而至道之質是以託諸魯以律天下之君大夫其賞之也非曰吾賞之也魯賞之也其罰之也非曰吾罰之也

魯罰之也魯周公之後而聖人之祚嗣也賞罰之權天子不能以自執推而予之於魯魯亦不能以自有推而本之於周周之典禮周公之為也以周公之後而行周公之典禮而律天下之君大夫或者其庶幾乎此聖人之意也且夫夫子匹夫也固不得以擅天王之賞罰魯諸侯之國也獨可以擅天王之賞罰乎魯不可以擅天王賞罰之權而夫子乃因推而予之則是夫子為其實而魯獨受其名夫子不敢以自僭而乃使魯僭之聖人

尤不如是也大抵學者之失往往在於尊聖人太過而  
不明乎義理之當然於是過為之論意欲尊夫子而實  
背之或謂兼三代之制其意以為夏時商輅周冕韶樂  
聖人之所以告顏淵者不見諸用而寓其說於春秋此  
皆一切繆妄之論其大要皆主於以禮樂賞罰之權為  
聖人自私之具爾夫四代禮樂孔子之所以告顏淵者  
亦謂其得志行道則當如是爾豈有無其位而修當時  
之史乃遽正之以四代禮樂之制乎夫子魯人也故所

脩者魯史其時周也故所用者時王之制此則聖人之  
大法也謂其於修春秋之時而竊禮樂賞罰之權以自  
任變時王之法兼三代之制不幾於誣聖人乎學者學  
不知道妄相傳襲其為傷教害義於是為甚後之觀春  
秋者必知夫子未嘗以禮樂賞罰之權自任而後可以  
破諸儒之說諸儒之說既破而後吾夫子所以修春秋  
之旨與夫孟子所謂天子之事者皆可以得而知之矣

論二

六經之不明諸儒穿鑿害之也而春秋為尤甚春秋穿鑿之患其原起於三傳而後之諸儒又從而羽翼之橫生意見巧出義理有一事而或以為褒或以為貶彼此互相矛盾者矣有事同而前以為褒後以為貶前後自相牴牾者矣紛紛聚訟而聖人之意益以不明然其大端不過有二一曰以日月為褒貶之說二曰以名稱爵號為褒貶之說彼徒見夫盟一也而有日者有不日者奔宜書日也而或書時入宜書日也而或書月若是其

不同也於是而有以日月為褻貶之說又見夫國君一也而或書子或書侯或書伯外裔一也而或書州或書國或書人或一人而前氏後名又若是其異也於是有以名稱爵號為褻貶之說愚請有以折之蔑之盟不日則曰其盟渝之也柯之盟不日則曰信之也將以渝之者為是乎信之者為是乎桓之盟不日而葵丘之盟則曰之或曰危之也或曰美之也將以危之者為是乎美之者為是乎公子益師卒不日左氏曰公不與小斂也然

公孫敖卒于外而公在內叔孫婁卒于內而公在外公  
不與小斂也明矣又何以書日乎公羊曰公子益師遠  
也然公子彊亦遠矣又何以書日乎穀梁曰不日惡也  
然公子牙季孫意如亦惡矣又何以書日乎葬必書月  
日而有不書月日者則曰不及時而日渴葬也不及時  
而不日慢葬也過時而日隱之也過時而不日謂之不  
能葬也當時而不日正也當時而日危不得葬也然過  
時而日直指齊桓公而言當是時公子爭國危之隱也

可也衛穆公宋文公無齊桓之賢無爭國之患過時而  
日有何可隱之乎宋穆公之日葬又有何危乎凡此者  
皆疑誤而難通者也孰謂春秋必以日月為褒貶乎至  
於來歸仲子之贈而宰書名則曰貶之也使榮叔歸成  
風之含贈而王不書天亦曰貶之也豈歸仲子之贈罪  
在冢宰而不在天王乎歸成風之含贈咎在天王而不  
在榮叔乎春秋書王本以正名分而夫子乃自貶王而  
去其天則將以是為正名分可乎穀伯鄧侯稱名說者

曰朝弑逆之人故貶之滕子杞侯獨非朝弑逆之人乎  
滕薛來朝稱侯說者曰滕薛微國也以其先朝隱公故  
褒之朝隱有何可褒而褒之乎若以隱為始受命之君  
則尤繆妄之甚者也或曰滕本侯爵也朝弑逆之人貶  
而稱子朝桓可貶也終春秋之世不復稱侯豈皆以朝  
桓之故而貶之乎或曰為時王所黜也夫使時王而能  
升黜諸侯之爵則是禮樂賞罰之權天王能自執矣安  
得為春秋之世乎先書荆繼書楚已而書楚子說者曰

漸進之也夫楚本鬻熊之後春秋以其僭王肆暴而遂  
黜之且既列南荒聖人作經本以辨內外之分而顧乃  
進楚而退中國乎若此之類不可以一二數要有疑誤  
而難通者也孰謂春秋以名稱爵號為褒貶乎大抵春  
秋以事係日以日係月以月係時事成於日者書日事  
成於月者書月事成於時者書時故凡朝覲蒐狩城築  
作毀凡如此者皆以時成者也會遇平如來至侵伐圍  
取救次遷成襲奔叛執放水旱雨雹冰雪彗孛蝻螟凡

如此者或以月成或以日成也崩薨卒弑葬郊廟之祭盟狩敗入滅獲日食星變山崩地震水災凡如此者皆以日成也其或宜月而不月宜日而不日者皆史失之也假如某事當書月而魯史但書其時某事當書日而魯史但書其月聖人安得虛增甲子乎是春秋不以日月為例也春秋據事直書而善惡自見名稱爵號從其名稱爵號而是非善惡則係乎其文非書名者皆貶而書字者皆褒也假令某與某在所褒而舊史但著其名

其與某在所貶而舊史只著其字則聖人將奔走列國以求其名與字而後著之於經乎是春秋不以名稱爵號為褒貶也若夫因其所書月日之前後而知其是非因其名稱爵號之異同而知其事實則固有之矣非聖人因以是為褒貶也有如莊三十一年春築臺于郎夏築臺于薛秋築臺于秦三十二年春城小穀則有以見纔閱三時而大工屢興也宣十五年秋螽冬蟥生則有以見連歷二時而災害荐作也莊八年春師次于郎夏

師及齊師圍郕秋師還則有以見閱三時而勞兵于外也  
若此之類蓋於書時見之桓二年秋七月杞侯來朝九月  
入杞則有以見來朝方閱一月而遽興兵以入之也昭七  
年三月公如楚九月公至自楚則有以見其朝夷狄之  
國閱七月之久而勞於行也僖二年冬十月不雨三年  
春王正月不雨夏四月不雨六月雨則有以見其閱九  
月而後雨也若此之類蓋於書月見之癸酉大雨震電  
庚辰大雨雪則有以見八日之間而再見天變也辛未

取郕辛巳取防則有以見旬日之間而取其二邑壬申御廩灾乙亥嘗則有以見其嘗於灾餘之為不敬巳丑葬敬嬴庚寅而克葬則有以見明日乃葬之為無備丙午及荀庚盟丁未及孫良夫盟則有以見魯人之先晉而後衛巳未同盟于雞澤戊寅及陳袁僑盟則有以見晉人之先盟諸侯而後盟大夫若此之類蓋於書日見之然以是謂聖人以日月之書不書寓褒貶則誤矣若夫名稱爵號之異同則有以事之大小而其辭因之以

詳略者亦有前日而後月者有蒙上文而殺其辭者固難以一例盡而時變之升降世道之盛衰亦有因之以見者楚一也始書荆再書楚已而書楚子吳一也始書吳再書人已而書吳子于以見吳楚之浸盛矣魯翬柔鄭宛詹始也大夫猶不氏于後則大夫無有不氏者鄭段陳陀衛州吁始也皆名之于後則雖弑君之賊亦有書氏者于以見大夫之浸強矣始也曹莒無大夫于後則曹莒皆有大夫于以見小國之大夫皆為政矣始也

吳楚君大夫皆書人于後則吳楚之臣亦書名于以見  
荆蠻之大夫皆往來於中國矣諸侯在喪稱子有書子  
而預會預伐者于以見居喪而會伐之為非禮也杞公  
爵也而書伯滕侯爵也而書子于以見其不用周爵而  
以國之大小為強弱也會于曹蔡先衛伐鄭則衛先蔡  
于以見當時諸侯皆以目前之利害而不復用周班也  
幽之盟男先伯淮之會男先侯戚之會子先伯蕭魚之  
會世子長於小國之君于以見伯者為政皆以私意為

輕重而無復禮文也垂隴之盟內之則公孫敖會諸侯  
召陵侵楚之師外之則齊國夏會伯主于以見大夫敵  
於諸侯而莫知其非也凡此者莫非名稱從其名稱爵  
號從其爵號而是非善惡乃因之而見之初非聖人特  
以是為褒貶也學者必欲於名稱爵號之間而求聖人  
褒貶之意則窒礙而不通矣於其不通也而強為之說  
則務為新巧何所不至甚非聖人明白正大之心爾  
學者之觀春秋必先破春秋以日月為例之說與夫以

名稱爵號為褒貶之說而後春秋之旨可得而論矣

論三

或曰子謂春秋不以日月名稱爵號為褒貶則信然矣  
若是則春秋所書皆據舊史爾所謂門人高弟不能贊  
一辭者其義安在曰有春秋之達例有聖人之特筆有  
日則書曰有月則書月名稱從其名稱爵號從其爵號  
與夫盟則書盟會則書會卒則書卒葬則書葬戰則書  
戰伐則書伐弑則書弑殺則書殺一因其事實而吾無

加損焉此達例也其或史之所無而筆之以示義史之  
所有而削之以示戒者此特筆也元年春正月此史之  
舊文也加王馬是聖人筆之也中國之諸侯有葬吳楚  
君者矣而吳楚之君不書葬是聖人削之也晉侯召王  
見於傳者之所載而聖人書之曰狩所以存天下之防  
甯殖出其君名在諸侯之策而聖人書之曰衛侯出奔  
所以示人君之戒不但曰仲子而曰惠公仲子不但曰  
成風而曰僖公成風不曰陳黃而曰陳侯之弟黃不曰

衛繫而曰衛侯之兄繫陽虎陪臣書之曰盜吳楚僭號  
書之曰子糾不書齊而小白書齊突不書鄭而忽書鄭  
立晉而書衛人立王子朝而書尹氏凡此者皆聖人之  
特筆也故曰其事則齊桓晉文其文則史其義則丘竊  
取之矣蓋用達例而無加損者聖人之公心有特筆以  
明其是非者聖人之精義達例所書非必聖人而後能  
雖門人高弟預之可也精義所在豈門人高弟所能措  
其辭哉非聖人則不能與於此學者之觀春秋必知孰

金史四庫全書  
為春秋之達例孰為聖人之特筆而後可觀春秋矣抑  
愚嘗深惟春秋之義竊以為其大旨有三一曰明分義  
二曰正名實三曰著幾微所謂明分義者何也每月書  
正以明正朔之所自出王人雖微必序於諸侯之上皆  
所以序君臣內齊而外楚內晉而外吳始書荆而後書  
楚始書吳而後書子皆所以別內外書陳黃衛繫所以  
明兄弟之義書晉申生許止所以明父子之恩曹羈鄭  
忽長幼之序也成風仲子嫡庶之別也凡此之類皆所

以明分義所謂正名實者何也傳稱隱為攝而聖人書之曰公則非攝矣傳稱許止不嘗藥而聖人書之曰弑則非不嘗藥矣卓之立未踰年而聖人正其名曰君則里克之罪不能逃夷臯之弑既歸獄於趙穿而聖人書之曰盾則趙盾之情不能掩齊無知陳佗踰年之君也而書之曰殺正討賊之名也陽虎陪臣也而書之曰盜正賤者之罪也凡此之類皆所以正名實所謂著幾微者何也鄭伯使宛來歸祔而聖人書之曰入者內弗

受之辭也天王狩於河陽壬申公朝于王所明因狩而後朝也公自京師遂會諸侯伐秦明因會伐而如京師也公子結媵婦遂及齊侯宋公盟著公子結之專也公會齊侯鄭伯于中丘翬帥師會齊人鄭人伐宋著公子翬之擅也葵丘之會宰周公與焉已而書曰戊辰諸侯盟于葵丘明宰周公之不與盟也溴梁之會諸侯咸在已而書曰戊寅大夫盟明大夫之自盟也凡此之類皆所以著幾微其他書法蓋亦不一而足然其大旨亦不

出於三者之外矣聖人之筆如化工隨物賦形洪纖高下各得其所生生之意常流行於其間雖其所紀事實不出於魯史之舊而其精神風采則異矣學者之觀春秋要必知有春秋之達例則日月名稱如後世諸學之穿鑿者必不同也要必知有聖人之特筆則夫分義之間名實之辨幾微之際有關於理義之大者不可不深察也若曰春秋但約魯史之文使其文簡事核而已則夫人皆能之矣何以為春秋

論四

讀春秋者先明大義其次觀世變所謂世變者何也春秋之始是世道之一變也春秋之終是世道之一變也劉知幾乃云孔子述史始於堯典終於獲麟蓋書之終春秋之始孔子述書至文侯之命而終者文侯之命平王之始年也隱公之初平王之末年也平王之始不共戴天之讎未報而其命文侯之辭曰汝多脩扞我于艱患已弭矣用賚爾秬鬯一卣功已報矣其歸視爾師寧

爾邦國無復事矣即此一編而觀之已無興復之望然  
而聖人猶不忍絕也蓋遲之四十九年而無復一毫振  
起之意聖人於是絕望矣由是而上則為西周由是而  
下則為春秋此獨非世道一變之會乎此春秋之所以  
始也入春秋而楚始橫然猶時有勝負也蓋至於獲麟  
之前歲而吳以被髮文身之俗偃然與晉侯為兩伯矣  
入春秋而大夫強然猶未至於竊位也蓋至於獲麟之  
歲而齊陳常弑其君齊自是為田氏矣在魯則自季孫

逐君之後魯國之政盡在三家而魯君如贅旒矣在晉則自趙鞅入絳之後晉國之政盡在六卿而趙籍韓虔魏斯為諸侯之漸已具矣向也南蠻之交於中國者其大莫如楚而今也以望國東方之魯而奔走於偏方下國之越以求自安矣向也諸侯猶有伯而今也伯主不競而諸侯之爭城爭地者日以擾擾而無一息寧矣故自獲麟之前其世變為春秋自獲麟之後其世變為戰國此又非世道一變之會乎是春秋之所終也然不特

此也合春秋一經觀之則有所謂隱桓莊閔之春秋有  
所謂僖文宣成之春秋有所謂襄昭定哀之春秋伯主  
未盛之時莊之十三年而會于北杏二十七年而同盟  
于幽於是合天下而聽命於一邦矣合天下而聽命於  
一邦古無有也僖之元年而齊遷邢三年城衛四年伐  
楚五年會世子九年盟葵丘而安中夏攘強暴之權皆  
在伯主矣伯主之未興諸侯無所統也而天下猶知有  
王故隱桓之春秋各書王伯主之既興諸侯有所統也

而天下始不知有王故僖文以後之春秋其書王者極寡伯主之興固世道之一幸而王迹之熄獨非世道之衰邪僖之十七年而小白卒小白卒而楚始橫中國無伯者十餘年二十八年而有城濮之戰於是中國之伯昔之在齊桓者今轉而歸晉文矣晉襄繼之猶能嗣文之業靈成景厲不足以繼悼公再伯而得鄭駕楚尚庶幾焉自是而後晉伯不競蓋至於襄之廿七年而宋之會晉楚之從交相見昭之元年而號之會再讀舊書於是晉楚

夷矣四年而楚靈大會于申實用齊桓召陵之典晉蓋  
不預中國之事者十年平丘之盟雖曰再主夏盟而晉  
之會諸侯由是止鄢陵以後參盟見矣參盟見而後諸  
侯無主盟者矣天下之有伯非美事也天下之無伯非  
細故也天下之無伯而春秋終焉故觀隱桓莊閔之春  
秋固已傷王迹之熄觀襄昭定哀之春秋尤以傷伯業  
之衰此特其大者耳其他如荆人來聘荆蠻之臣始未  
有名字也于後則名氏著於經矣無駭挾卒諸侯之大

夫始未有書氏也于後則有生而名氏著矣始也諸侯盟諸侯于後則大夫盟諸侯矣始也諸侯自相盟于後則大夫自相盟矣始也諸侯僭天子于後則大夫僭諸侯矣始也大夫竊諸侯之柄于後則陪臣據大夫之邑矣會春秋一經觀之大抵愈趨愈下愈久愈薄邈之上則文武成康之盛可以接堯舜之傳沿之而下則七雄分裂之極不至於秦不止後之作編年通鑑者託始於韓趙魏之為諸侯其亦所以繼春秋之後歟學春秋

者既能先明大義以究理之精又能次觀世變以研事之實則春秋一經亦思過半矣

論五

學春秋者舍三傳無所考而士之有志者類欲盡求三傳獨抱遺經豈非以其互相牴牾更相矛盾而不一其說乎竊嘗思之左氏熟於事而公穀深於理蓋左氏曾見國史故雖熟於事而理不明公穀出於經生所傳故雖深於理而事多繆二者合而觀之可也然左氏雖曰

備事而其間有不得其事之實公穀雖曰言理而其間有害於理之正者不可不知也蓋左氏每述一事必究其事之所由深於情偽熟於世故往往論其成敗而不論其是非習於時世之所趨而不明乎大義之所在周鄭交質而曰信不由中質無益也論宋宣公立穆公而曰可謂知人矣鬻拳強諫楚子臨之以兵而謂鬻拳為愛君趙盾亡不越境返不討賊而曰惜也越境乃免此其皆不明理之故而其叙事失實者尤多有如楚自得志

漢東駸駸荐食上國齊桓出而攘之晉文再攘之其功偉矣此孟子所謂彼善於此者然其所以攘楚者豈能驟舉而攘之哉必先翦其手足破其黨與而後攘之易耳是故桓公將攘楚必先有事于蔡晉文將攘楚必先有事于曹衛此事實也而左氏不達其故於侵蔡則曰為蔡姬故於侵曹伐衛則曰為觀浴與塊故此其病在於推尋事由毛舉細故而二公攘夷安夏之烈皆晦而不彰其他紀年往往類此然則左氏之紀事固不可廢

而未可盡以為據也宗左氏者以為丘明受經於仲尼  
所謂好惡與聖人同者然左氏大旨多與經戾安得以  
為好惡與聖人同乎觀孔子所謂左丘明恥之丘亦恥  
之乃竊比老彭之意則其人當在孔子之前而左氏傳  
春秋其事終於智伯乃在孔子之後說者以為與聖人  
同者為左丘明而傳春秋者為左氏蓋有證矣或以為  
六國時人或以為楚左史倚相之後蓋以所載虞不臘  
等語蓋秦人以十二月為臘月而左氏所述楚事極詳

蓋有無經之傳而未有無傳之經亦一證也若夫公穀  
二氏固非親受經者其所述事多是採之傳聞又不曾  
見國史故其事多謬誤略其事而觀其理則其間固有  
精到者而其害於理者亦甚衆此尤致知者之所宜知  
而深辨之也公羊論隱桓之貴賤而曰子以母貴母以  
子貴夫謂子以母貴可也謂母以子貴可乎推此言也  
所以長後世妾母陵僭之禍者皆此言基之也穀梁論  
世子崩殯之事則曰信父而辭王父則是不尊王父也

其弗受以尊王父也夫尊王父可也不受其父命可乎  
推此言也所以啓後世子子爭奪之禍者未必不以此  
言藉口也晉趙鞅入於晉陽以叛趙鞅歸于晉公穀皆  
曰其言歸何以地正國也後之臣子有據邑以叛而以  
逐君側之小人為辭者矣公子結媵婦遂盟公羊曰大  
夫受命不受辭出境有可以安社稷利國家則專之可  
也後之人臣有事異域而以安社稷利國家自諉者矣  
祭仲執而鄭忽出其罪在祭仲也而公羊則以為合於


反經之權後世蓋有廢置其君如奕棊者矣聖人作經  
本以明其理也自傳者學不知道妄為之說而是非易  
位義利無別其極於下之僭上卑之陵尊父子相夷兄  
弟為讎為大臣而稱兵以向闕出境外而矯制以行事  
國家易姓而為其大臣者反以盛德自居而無所愧君  
如武帝臣如雋不疑皆以春秋定國論而不知其非也此  
其為害甚者不由於敘事失實之過哉故嘗以為三傳  
要皆失實而失之多者莫如公羊何范杜三家各自為

說而說之繆者莫如何休公羊之失既已略舉其二而何休之繆為尤甚元年春王正月公羊不過曰君之始年爾何休則曰春秋紀新王受命於魯滕侯卒不日不過曰滕微國而侯不嫌也而休則曰春秋王魯託隱公以為始黜周王魯公羊未有明文也而休乃唱之其誣聖人也甚矣公羊曰母弟稱弟母兄稱兄此其言已有失矣而休又從為之說曰春秋變周之文從商之質質家親親明當親厚於羣公子也使後世有親厚於同母

弟也而薄於父之枝葉者未必不由斯言啓之公羊曰  
立子以長不以賢立子以貴不以長此言固有據也而  
何休乃為之說曰嫡子有孫而死質家親親先立弟文  
家尊尊先立孫使後世有感於質文之異而嫡庶互爭  
者未必非斯語禍之其釋會戎之文則曰王者所不治  
也錄戎來者勿拒去者勿追也春秋之作本以正夫內  
外之分乃謂之王者不治可乎其釋天王使來歸贈之  
義則曰王者據土與諸侯分職俱南面而治有不純臣

之義春秋之作本以正君臣之分乃謂有不純臣之義  
可乎隱三年春二月己巳日有食之公羊不過曰記異  
也而何休則曰是後衛州吁弑其君諸侯初僭桓元年  
秋大水公羊不過曰記災也而休則曰先是桓篡隱與  
專易朝宿之地陰逆與怨氣所致而凡地震山崩星電  
雨雪螽螟彗孛之類莫不推尋其致變之由考驗其為  
異之應其不合者必強為之說春秋紀災異初不說其  
應曾若是之瑣碎磔裂乎若此之類不一而足凡皆休

之妄也愚觀三子之釋傳惟范甯差少過其於穀梁之義有未安者輒曰甯未詳蓋譏之也而何休則曲為之說適以增公羊之過耳故曰范甯穀梁之忠臣何休公羊之罪人也



春秋五論